

23 167 visetas da Trin tochen Schluein

Radunonza generala dall'uniun Spitex Selva

■ (anr/abc) Avon cuort ha l'uniun Spitex Selva envidau a sia radunonza generala. En preschientscha dils responsabels dallas vischnauncas purtadras ha la meinagestiuon Anni Adam-Cahenzli rapportau ch'ins hagi stuiu duminar il 2018 in considerabel augment da lavur. Suenten in augment enorm dallas prestaziuns da spitex digl onn 2016 sil 2017 seigien quellas s'augmentadas il 2018 per puspei 12 pertschien. Enteifer dus onns hagi l'organisaziun giu da prestar 34 pertschien dapli uras, ils davos tschun onns s'erisulti in augment da 60 pertschien. Quella bilanza generala trai la menadra operativa dalla Spitex Selva, Anni Adam-Cahenzli. Margis sera, a caschun dalla 19avla radunonza generala ha ella presentau las graficas cun petgas e paliats che muossan cuntinuadamein ensi.

31 collaboraturas

Igl onn 2012 haveva l'organisaziun per la tgira ed assistenza a casa giu quita da 132 clients ellas vischnauncas da Trin, Flem, Falera, Laax e Sagogn. La bilanza dil 2018 se presenta suandontamein: a 184 clients ha la Spitex Selva prestau 16 844 uras survetschs. Il diember da visetas ei s'augmentaus fermamein. En tut eis ei 23 167, quei munta 63 acziuns a gi, avon tschun onns fuvi 35 acziuns. Avon quater onns ei dil reminent era la vischnaunca da Schluein associada alla Spitex Selva.

En vesta alla carschen cuntinuada ha la gestiun stuiu refusar damondas da hosps da vacanzas che havessen bugen profitau dils survetschs. En tals cass ha la Spitex Selva saviu recumandar las spitex privatas. Igl onn 2018 ha l'organisaziun stuiu encurir e pladir siat persunas novas per saver dar damogn alla lavur. Gia la fin digl onn 2018 eis ei denton semussau

che la curva dallas uras d'acziuns sesaulza vinavon ensi e ch'igl ei necessari d'encurir danovamein personal. Per quei motiv hagian ins lu era stuiu adattar las estructuras dalla direcziun ed engaschar personal era en quei sector. L'entschatta matg 2019 ha Yvonne Stangl-Schlanser entschiet sia plazza sco secunda menadra d'intervenziun cun Petra Camathias-

Kunz ch'ei dapi zacons onns en quei post.

Gia igl onn vargau haveva la meinagestiuon Anni Adam explicau alla radunonza ils motivs che caschunan quella enorma carschen da lavur. Generalmeis eis ei aschia ch'ils spitals tarmettan a casa ils pazients gia suenter paucs dis. Suenten il retuorn a casa drovan talas persunas vina-

von tgira ed assistenza. Era ein las cassas da malsauns pli e pli restrictivas en connex cun finanziar dimoras da reconvalescenza suenter il spital. La lavur dalla Spitex Selva partan 31 collaboraturas che lavuran en pensums denter tschun e 100 pertschien. Endisch lavuran sco tgirunzas diplomadas, quater specialistas da sanadad, ina specialista da sanadad en scolaziun, ina tgirunza da casa, endisch assistentas da casa e treis gidontras da tenercasa, ina tgirunza da casa diplomada, in'assistenta sanitaria diplomada, 11 assistentas ed ina gidontra da casa. Per ademplir tutta lavur igl onn vargau ha la Spitex Selva occupau 14 plazzas entiras.

La Spitex Selva ei l'uniun purtadra d'in survetsch intercommunal sanitar. Leutier s'auda era il survetsch culs autists che segidan tier la repartiziun dallas tschaveras ed il survetsch da transport. Quella gruppa da 36 voluntaris fuorma ina petga impurtonta dalla spitex. Las sis vischnauncas, da Trin tochen Schluein han buca stuiu purtar in deficit. Il quen 2018 ha la gestiun terminau cun in avanzament da 7109 francs. Tenor lescha cantunala han Flem, Trin, Laax, Falera, Sagogn e Schluein partiu la contribuziun totala da 301 547 francs, il cantun da sia vart ha contribuui la summa cumulada da 367 706 francs. La Spitex Selva ha lavrau igl onn vargau cun entradas dad 1 563 403 per furniziuns e prestaziuns ed expensas dad 1 556 294 francs per far quellas.



La meinagestiuon Anni Adam-Cahenzli (amiez) cullas duas menadras d'intervenziun Petra Camathias-Kunz (dretg) ed Yvonne Stangl (sen.).

FOTO A. BEELI